

Powšitkowne WOZJEWJENJA

njedźelu, 29. januara 2012

Prěni wopomnjenski dzeń zbóžneho kapłana Alojsa

Po loňšim zbóžnoprajenju kapłana Alojsa Andrickeho smě so pjatk, 3. februara, prěni raz wopomnjenski swjedžen zbóžneho martrarja zjawnje woswjeć. Zhromadna swjatočna Boža mša serbskich wosadow budže w 19 hodź. w Róžeńće. Předować budže pater Martin Wolf z rjadu oblatow. Wšitcy wěriwi ze serbskich wosadow su wutrobnje do putniskeje swjatnicy přeprošeni.

Młodži a dorosćeni chwala Boha

Młodostni a dorosćeni su sobotu, 4. februara, w 19.00 hodź. do Radworskeje farskeje cyrkwe na wječor modlenja z patrom Hünfeldskich oblatow, Martinom Wolfom, přeprošeni. Wječor zarjadujetej dekanatne dušepastyrstwo młodžiny a Radworska wosadna młodžina.

Dźiwadłowa hra wo zbóžnym Alojsu

Němskorěčnu dźiwadłowu hru „Wende Andritzki“ předstajeja młodostni z třoch wosadow składnostnje přnjeho wopomnjenskeho dnja zbóžneho Alojsa Andrickeho dwójce we Łužicy. W Smochčanskim Domje biskopa Bena budže to sobotu, 4. februara, w 19.30 hodź, w Chróšćanskej cyrkwi pak njedźelu, 5. februara, w 16 hodź. Hru spisał je z Pólskeje pochodzacy kapłan Adam Ryszard Prokop, kotryž skutkuje tuchwilu w Gerje. Prapremjera hry bě w předpolu zbóžnoprajenja loni 11. junija w Drježdžanach. Katolski Posoł je wo hrě w swoim wosebitym wudaću po zbóžnoprajenju rozprawjał.

Hłowna zhromadźizna TCM a patronatne kemše

Lětuša hłowna zhromadźizna Towarstwa Cyrila a Metoda z.t. (TCM) budže pjatk, 27. apryla, wječor w Chróšćicach. Na swjedženju swjateju Cyrila a Metoda wutoru, 14. februara, w 19 hodź. budže w Baćonju patronatna Boža mša.

Domyswjećenje w Don Boskowym domje

Na swjedženju Don Boska, wutoru, 31. januara, přeprošuje dekanatne dušepastyrstwo młodžiny wšitkich młodostnych serbskich wosadow na domyswjećenje do Don Boskowneho domu do Worklec. Započatk je w 19.00 hodź.

„Što ćehnje mje do južneje Azije?“

Farar Clemens Hrjehor rozprawja pónđzlu, 30. januara, w Domje swjateho Jana w Smječkach pod hesłom „Što ćehnje mje do južneje Azije?“ wo swoich jězbach do Indiskeje, Bhutana, Taiwana a na Filipiny. Spočatk je w 19 hodź. Na zjawnym přednošk w serbskej rěči wutrobnje přeprošuje nawoda domu Tadej Šiman.

Kubłanski dzeń za 1. a 2. lětnik

Dekanatne dušepastyrstwo přeprošuje šulerki a šulerjow 1. a 2. lětnika štwórtk, 23. februara, wot 9 do 15 hodź. na kubłanski dzeń pod temu „Nowy spočatk“ do Don Boskowneho domu we Worklecach. Zajimcy njech so prošu hač do štwórtka, 16. februara, pod telefonowym čisłom (03 57 96) 8 87 07 we Worklecach přizjewja. Za wudawki dnja zhromadži so wot kóždeho wobdźělnika přinošk we wysokosći třoch eurow.

Přidatny seminar mandželstwa

Dekanatne dušepastyrstwo młodžiny zarjaduje pjatk a sobotu, 30. a 31. měrca, přidatny seminar mandželstwa. Tutón wotměje so w farskej wikariji w Pančicach Kukowje. Zajimcy měli so jenož pisomnje přizjewić, pak z listom na adresu Dekanatne dušepastyrstwo młodžiny, Młynski puć 2, 01920 Worklecy, abo na faxowe čisło (03 57 96) 8 87 07. Dotal planowanej seminaraj mandželstwa w februaru a měrcu stej hižo wučeženej.

„Naša ćeta Mija“

Dźiwadłowa skupina Kulowskeho Bratrowstwa přeprašuje wšitkich na wjeselohru „Naša ćeta Mija“. Přichodne předstajenja budžeja njeźelu, 29. januara, w 16 hodź. w Haslowje, njeźelu, 26. februara, we 18.30 hodź. w Šunowje a njeźelu, 11. měrca, w 17 hodź. w třělcowni (Schützenhaus) w Kulowje.

Henrietta Kretz – jedna z poslednich swědkow nacistiskeho potłóčowanja – porěči we Łužicy

Jako džewječlětna holčka je wona dožiwić dyrbjala, kak buštej mać a nan před jeje wočomaj za třělenaj. Nan bě džowce hišće přiwołał: „Běž preč!“ Jenož dokelž bě to tehdy činiła, móže wona nětkole přińć, zo by wo tym a wšěm druhim rozprawjala, štož je w židowskej swójbje za čas nacionalsocializma dožiwiła. Henrietta Kretz z Antwerpena w Belgiskej přińdže na přeprašenje sekcije wěda a skutk Towarstwa Cyrila a Metoda do Budyšina, Ralbic, Worklec a Radworja. W Budyskim serbskim gymnaziju a w Ralbičanskej kaž tež Radworskej a Worklečanskej srjedźnej šuli budže wona wo svojich nazhonjenjach dopołdnja před šulerjemi přednošować, wječor pak před staršimi a dalšimi zajimcami. Wšitcy, wšojedne hač maja abo nimaja džěci na tutych šulach, su na zjawnej zarjadowani pónźelu, 30. januara, w 19 hodź. do Budyskeho serbskeho gymnazija na Friedricha Listowej 8, respektiwne wutoru, 31. januara, w 19 hodź. do Ralbičanskeje šule přeprašeni.

Na Mačićnej akademiji wo von Gersdorffe

Wo dotal mało znatym lužiskim zemjanu a spěchowarju Serbow přednošuje štwórtk, 2. februara, w 19.30 hodź. w Budyskim hosćencu „Wjelbik“, Žitna 7, cyrkwinska stawiznarka Lubina Malinkowa ze Spitzkunnersdorfa. Z Budyšina pochadźaca mloda wědomostnica předstaji swoje slědženja k temje „Friedrich Caspar von Gersdorf (1699–1751) a jeho zaslužby wo serbske duchownstwo, šulstwo a pismowstwo“. Přednošk je w serbskej rěči, zastup je darmotny.

Putniska jězba do Fatimy a Santiago de Compostela

Wot pónđzele do pónđzele, 10. do 17. septembra, wotměje so putniska jězba do Portugalskeje a Španiskeje. Putnicy wopytaja mjez druhim Lissabon, Fátimu a Porto kaž tež Santiago de Compostela a Cabo Finisterre. Dalše informacije poda a přizjewjenja přijimuje Matthias Hadank, z Hórkow, Sydlišćowy puć 2, telefonowe čisło (03 57 96) 9 40 37.